



**Komunikadu Imprensa**  
**11 Agostu 2021**

**Primeravés simu treinamentu kona-ba lala'ok justisa**  
**“Komunidade Suku Zulo foin hatene loloos prosedimentu justisa formal”**

Iha 05 Agostu 2021, JSMP kontinua realiza treinamentu ba membru konsellu suku no comunidade fetu iha suku Zulo, Postu Administrativu Zumalai, Munisípiu Covalima ho materia “Demokrasia, Knaar órgaun soberanu, partisipasaun públiku iha prosesu halo lei no Asesu ba Justisa formal.

Partisipante sira ne'ebé partisipa iha treinamentu ne'e hamutuk ema na'in 20 ne'ebé kompostu husi fetu 15 no mane 5 ne'ebé mai husi Xefe Aldeia, Representante fetu, delegadu/a sira no comunidade Suku Zulo.

Treinamentu ne'e ho objetivu atu hasa'e koñesimentu membru comunidade fetu no konsellu suku sira kona-ba demokrasia, kna'ar órgaun soberanu, partisipasaun públiku iha prosesu halo lei, asesu ba justisa formal inklui hatene sira nia direitu kona-ba liberdade atu asesu ba informasaun nune'e bele mellora liutan sira nia serbisu iha comunidade.

“Treinamentu ne'e nu'udar meu ida atu hasa'e koñesimentu comunidade fetu no membru konsellu suku sira kona-ba sira nia direitu no obrigasaun sira iha Pais demokrasia, prosesu halo lei, no asesu ba justisa formál, nune'e bele ajuda membru comunidade sira lori sira nia direitu no interese sira ne'ebé lei proteze ba iha justisa formal. Alende ne'e sira mós bele iha koñesimentu kona-ba direitu sira nian atu ho liberdade asesu ba informasaun,” dehan Sra. Ana Paula Marçal, Diretora Ezekutiva JSMP.

Materia ne'ebé fahe iha sesaun treinamentu ne'e mak hanesan demokrasia, kna'ar órgaun soberanu, partisipansaun públiku iha prosesu halo lei, asesu ba justisa formal (direitu, lei, krime, kna'ar juis, prokuradór, defensór públiku/advogadu privadu no polísia) no direitu atu ho liberdade asesu ba informasaun tuir Konsitituisaun.

Iha sesaun treinamentu ne'e partisipante sira ativu teb-tebes hodi husu perguntas no fó komentáriu. Iha materia sesaun demokrasia nian partisipante sira husu kona-ba orgaun sóberanu sira iha imunidade maibé povu laiha no iha sesaun sistema justisa formal partisipante sira kestiona kona-ba ajente polísia baku comunidade no sira la keixa tanba ta'uk sira nia keixa ne'e la prosesu no kazu feen ho la'en husik malu no abandona oan sira.

Kestaun kona-ba imunidade ba orgaun membru Governu no Parlamentu Nasional, JSMP esplika katak Konstituisaun no Rejimentu Parlamentu Nasional fó duni imunidade ba membru Parlamentu Nasionál no membru Governu sira atu la responsabiliza ba nia aktu krime sira

Rua Beco Lakateu, Aldeia Manu fuiik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

ne'ebé nia kastigu la as liu tinan 2 no tinan 5 durante sira asume hela sira nia kna'ar, sira bele responsabiliza bainhira levanta ona sira nia imunidade iha parlamentu ka bainhira sira remata ona sira nia kargu nu'udar Membru Parlamentu ka Governu. Signifika sira nafatin responsabiliza ba sira nia aktu krime hanesan povu bain-bain maibé depoisde levantamentu sira nia imunidade ka sira husik ona sira nia kargu hanesan membru parlamentu ka membru governu tanba ho razaun sira asumi hela knaar ba interese públiku.

Kestaun kona-ba kazu ajente polisia baku comunidade maibé comunidade sira la ba keixa tanba ta'uk sira nia keixa ne'e la prosesu, JSMP hatan katak kuandu comunidade ta'uk ka dúvida lori kazu sira ne'ebé envolve ajente polisia ba keixa iha polisia, bele keixa diretamente ba iha prokuradór no bele mós ba apresenta keixa iha PDHJ.

Enkuantu kona-ba kazu abandona, tuir partisipante sira katak durante ne'e sira nia comunidade lubuk ida mak infrenta situasaun ne'e inklui partisipante na'in rua ne'ebé sira nia la'en husik sira no abandona sira nia oan. Sira nia kumprensaun katak abandona la'os krime no la hatene oinsa atu prosesu sira nia kazu ne'e. Relasiona ho kestaun ne'e, JSMP esprika katak bainhira la'en abandona nia feen no oan sira kazu ne'e ho karakter urjente bele lori kedan ba iha unidade polisia ba ema vulneravel (VPU) no ka ba direta iha Ministériu Públiku tanba sira mak representa menór hodi lori prosesu ne'e ba iha tribunál nune'e labarik sira bele hetan alimentasaun husi nia aman sira. Bainhira aman ka inan la kumpri desizaun tribunál nian kona-ba alimentasaun ba nia oan, sira sei sai fali arguidu/a ba krime la halotuir obrigasaun alimentár tuir lei penál. Alende ne'e, JSMP mós introdús serbisu JSMP no ALFeLa nian relasiona ho asisténsia legál ba vítima violénsia bazeia ba jéneru.

Xefe Suku Zulo Sr. Joao Lopez de Carvalho iha nia intervensaun agradese tebes ba JSMP tanba mezmú iha situasaun defisil (serka sanitária) tanba pandemia Covid-19 maibé JSMP bele to'o iha sira nia suku hodi fahe informasaun importante ba comunidade Suku Zulo. Xefe suku ne'e mós haktuir katak durante nia mandatu foin primeiravés JSMP mak ba fahe informasaun kona-ba asesu ba justisa formal ba comunidade Suku Zulo no xefe suku ne'e fiar katak informasaun sira ne'ebé JSMP fahe ne'e, bele ajuda hariku liután membru konsellu suku sira no fetu potencial sira nia kapasidade hodi hala'o sira nia serbisu ho di'ak iha comunidade no bele ajuda comunidade sira bainhira comunidade sira hasoru problema ruma no oinsa atu ajuda lori sira nia kazu ba iha justisa formal kuandu iha violasaun ba sira nia direitu.

Aktividade treinamentu ne'e realiza ho fundus husi União Europeia, parseiru suporta husi CEPAD no treinamentu ne'e realiza husi JSMP.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)